



行無去

五歲彼年，叔伯阿姊講戲園開幕免費優待，欲去大姊個去看電影，我愛哭閣愛綴路嘛吵欲去。阮一行六、七名，對巷仔行出來，經過傀儡仔個兜的籤仔店，倒幹直行就行到上鬧熱的中山路。

叔伯阿姊個沿路行沿路講笑，我嘛共二姊的手牽牢牢，用五歲囡仔的懸度來看路裡咧走的三輪車，看餅店內底的糖仔餅……。到中山路遐正幹，行到有竝一塊蔣總統 khǎng-páng 的所在，對遐過大路，戲園就佇菜市仔的內底。

戲園內底有夠濟人，阮傷慢來煞揣無位通倚。叔伯阿姊映入實穢的人群內底，想欲看到底咧搬啥貨；大姊佻二姊嘛躡跤尾，向望會當「睇」著電影；我人矮，干焦看著跤腿，若擰頭，看的嘛是人的尻脊餅。我共二姊穿的彼軀紅裘仔認牢咧，映規晷，想講：「有聽聲、無看影的電影哪有啥物好看？」

一隻蠔咧共我叮，我用手去拚，拚了閣去摸二姊的衫裾尾，倚甲跤痠矣，規氣叫二姊共我抱。予我摸的彼个人向頭，問我講：「你摸我的手是欲創啥？」啊？伊毋是二姊！啊二姊個攏走去佗咧？這聲慘矣！佇暗烏的戲園內底看著的毋是跤腿就是尻脊餅，揣無個的影跡，無奈何，只好家己一个人行出戲園。

我想欲照原路轉去，行啊行，看著蔣總統的 khǎng-páng 就過過大路向倒片行。繼落去我就繼續行，奇怪？這條路哪會攏無看著巷仔？閣繼續行……，哪會無看著傀儡仔個兜彼間籤仔店？一直行到溪仔邊，我才確定家己行無去矣，因為佇目睷前的是一座橋，今，欲按怎？

「囡仔，你啥人的囡？哪會家己佇遮！」毋知經過偌久，天頂的紅霞目一下瞞嘛欲換穿彼領烏漚的風幔矣，一个騎孔明車的阿伯停落來問我。我講：「我是新田仔個囡，阮阿爸佇漁會食頭路。」「新田仔毋是躡佇車頭遐？你哪會家己走來遮？來，我載你轉去，若予人拐去賣，都無彩恁母仔咧飼。」

轉去到厝，看阿姊予人罰倚佇埕裡，阿母共彼个阿伯一直說多謝，了後細聲共我講：「你若予好額人拈去做囡，無定著會較好命！」

作者：霽虹

☆詞彙學習☆

【綴路】tuè-lōo/tè-lōo：跟屁股。緊跟在後面。

【khǎng-páng】：招牌、看板。

【過過】thàng--kuè/thàng--kè：鑽透、穿過。

【實穢】tsat-tsinn：紮實而沒有空隙的樣子。

【躡跤尾】neh-kha-bué/nih-kha-bé：躡起腳尖。

【摸】khiú：拉扯。

【衫裾尾】sann-ki-bué：衣服的下襬；衣尾。

【風幔】hong-mua：風衣、披風。

【孔明車】khóng-bîng-tshia：腳踏車。